

**Parnaarussap inuttaanik aamma pinerluteqarsimasunik isumaginnittoqarfiup
paaqqinniffiini isersimaartarfinnik misissuisarneq pillugu nalunaarut
(misissuisarnermik nalunaarut)**

Kalaallit Nunaannut pinerluttulerinermi inatsimmi § 221, imm. 5 naapertorlugu, tak. inatsit nr. 306, 30. april 2008-meersoq, aalajangersarneqarpoq:

Atuuffia

§1. Parnaarussap inuttaanik aamma isersimaartarfinnik misissuineq pisinnaavoq pinerluttulerinermi inatsimmi § 221 malillugu, taamaattoq tak. imm. 2.

Imm. 2. Pensionini inissitat timaannik pinerluttulerinermi inatsimmi § 221, imm. 1 malillugu misissuineq atisaajaanermik kinguneqassanngilaq, aamma pinerluttulerinermi inatsimmi § 221, imm. 2 malillugu parnaarussap inuttaanik (timimik misissuineq) sukumiinerusumik misissuisoqarsinnaanngilaq.

Timimik misissuataarineq aamma parnaarussap timaanik misissuineq

§ 2. Akuliunnerni, atisaajaanertalinni, parnaarussanik allanik najuuttoqassanngilaq.

§ 3. Timimik pinerluttulerinermi inatsimmi § 221, imm. 1 malillugu misissuataarinermut ilaapput akuliunnerit, inuup timaata iluanut kaatuinertaqanngitsut imaluunniit misissuinissaq siunertaralugu timimik attuuanninnivittaqaanngitsut.

§ 4. Parnaarussap timaanik misissuataarisoqartinnagu misissuisoqartinnagulu paaqqinniffiup parnaarussaqaq akuliunnermut toqqammaviusoq pillugu oqaatsitigut ilisimatissavaa, pissutsit immikkut ittut taamaaliornissamut akerliunngippata.

§ 5. Sulisut minnerpaamik marluk akuliunnermi peqataassapput. Akuliunnerit, atisaajaanermik kinguneqartut, taamaallaat pisinnaapput inuit parnaarussap suaassuseqatai isiginnaartillugit, peqqinissaqarfimmi sulisut misissuisuunngippata. Tamanna pissutsinit immikkut ittunit pisariaqartinneqarpat akuliunneq sulisumit ataatsimit isumagineqarsinnaavoq.

§ 6. Parnaarussaqaq itimigut-utsummigut misissortikkumanngippat, imaluunniit allat pissutigalugit misissuisoqarsinnaanngippat, parnaarussaqaq tamatumunnga taarsiullugu inimit kisimiitillugu inissinneqarsinnaavoq pigaartuusumit nakkutigineqarluni, kisimiititsilluni inissiisarneq pillugu nalunaarummi malittarisassat malillugit.

Parnaarussat isersimaartarfiannik misissuineq

§ 7. Parnaarussat isersimaartarfiannik misissuinermit sulisut minnerpaamik marluk peqataassapput. Tamannali pissutsinit immikkut ittunit pisariaqartinneqarpat misissuineq sulisumit ataatsimit ingerlanneqarsinnaavoq.

§ 8. Paaqqinniffik parnaarussat isersimaartarfiannik misissuereerpat, parnaarussaq tamatumangga ilisimatinneqassaaq.

Imm. 2. Paaqqinniffiup noqqaavigineqarnini malillugu pineqartoq misissuisoqarsimaneranut pissutaasumik ilisimatissavaa.

Imm. 3. Misissuineq parnaarussap pigisaanik isersimaartarfimmiittunik misissuilluinnarnermik kinguneqassappat, paaqqinniffiup parnaarussaq misissuinermik isiginnaartissavaa imaluunniit misissuinerup kingorna parnaarussaq misissuisimanermik inerneranillu nassuiaanneqarnissaanik neqeroorfigissavaa, pissutsit immikkut ittut tamatumunnga akerliunngippata.

§ 9. Misissuineq isersimaartarfiup tukattunngorneranik kinguneqarsimappat, paaqqinniffiup naleqquttumik torersaanissaq isumagissavaa.

Ataatsimut aalajangersakkat

§ 10. Makku allattorneqartassapput

- 1) timimik misissuineq
- 2) akuliunnerit, pissutsit immikkut ittut pissutigalugit sulisumit ataatsimit ingerlanneqarsimasut, tak. § 5 aamma § 7.
- 3) Akuliunnerit, atisaajaanermik kinguneqartut aamma parnaarussap suaassuseqatiginngisaanit najuuffigineqartut, naleq. § 5.

§ 11. Parnaarussap pigisai tigummigallarneqarpata paaqqinniffiup pigisat tigummigallarneqartut tulleriaarlugit allattussavai. Parnaarussaq tigummigallarneqartut pillugit ilisimatinneqassaaq aamma allattukkap nuutsinneqarneranik tunineqassaaq.

Imm. 2. Pigisat tigummigallarneqartut, arsaarinissutigineqanngitsut, paaqqinniffimmi toqqortarineqassapput pigisat pillugit nalunaarummi malittarisassat malillugit.

Imm. 3. Pigisat paaqqinniffimmit pigineqarpat arsaarutigineqarsinnaavoq.

Atortuulersitsineq

§ 12. Nalunaarut atortuulersinneqarpoq ulloq 1. januar2010.

Kalaallit Nunaanni Pinerluuteqarsimasunik Isumaginnittoqarfik, ulloq 7. december 2009

THOMAS NICOLAISEN